

Xabier Pérez Igrexas, en calidade de Portavoz do Grupo Municipal do Bloque Nacionalista Galego (BNG) no Concello de Vigo, ao abeiro do establecido no Regulamento Orgánico do Pleno e da restante normativa aplicábel, eleva ao Pleno da Corporación para o seu debate a seguinte

MOCIÓN

MEDIDAS PARA POÑER FIN AO ABANDONO DOS BARRIOS E PARROQUIAS DA CIDADE

EXPOSICIÓN DE MOTIVOS

Vigo non acaba no seu centro. Vigo configúrase como unha cidade policéntrica, engadíndolle ao centro tradicional ámbitos tan relevantes como As Travesas e o novo Vigo que se abre desde o PAU de Navia. A cidade non acaba no perímetro que delimitan o distrito electoral 1, senón que atinxe os seus 110 quilómetros cadrados. De Teis a Saiáns, do Casco Vello a Valadares. De Bouzas a Zamáns. Dos barrios urbanos ás parroquias rurais do litoral ou do interior. Das súas praias, que asoman a ese ecosistema privilexiado que é a Ría, até os montes que nos envolven e osixenan. No entanto, un dos elementos que, infelizmente, ten definido a política municipal nos últimos anos é o tan continuado como inxusto abandono que padecen os barrios e parroquias da cidade.

Un abandono que é especialmente inxusto e inxustificábel tendo en conta que non ten causa na falla de recursos municipais, toda vez a falla de xestión do actual Goberno municipal, centrado na propaganda e autobombo (cunha dopaxe publicitaria financiada con diñeiro público), deixou sen executar nos últimos 4 anos un total de 436 millóns de euros como recollen os datos oficiais das Contas Xerais elaboradas polos servizos municipais. Só no pasado exercicio 2022 foron 152 millóns de euros os non executados.

Un abandono tan real como negado polo Goberno municipal que se manifesta con diferentes formas e intensidades, pero que en suma acaba por se traducir na desatención das necesidades reais das viguesas e dos vigueses. Situación que acreditan as centos de queixas veciñais que cada ano son formuladas a través do tecido asociativo, do 010 ou do sitio web do Concello, e que nunha inmensa maioría non só non son atendidas senón que nin tan sequera reciben resposta. De asuntos aparentemente pequenos a necesidades de alcance estrutural. Desde a falla de mantemento do espazo público, quer de beirarúas, mobiliario ou iluminación, quer do axardinamento. De rúas intransitábeis por peóns até capas de rodadura impracticábeis polos vehículos. Da falla de limpeza naquelas rúas e camiños menos visíbeis até as roturas continuadas na rede de abastecemento de auga. Até un moi deficiente servizo de transporte urbano.

Mais para alén daquelas cuestións que se derivan das insuficiencias e/ou deficiencias na prestación de servizos municipais cuxa xestión está privatizada e consume (en beneficio de contratas e concesionarias) case 2 de cada 3 euros do orzamento municipal, hai tamén importantes défices dotacionais na práctica totalidade de barrios e parroquias. Desde pistas deportivas en estado ruinoso até salas de lectura nas que non hai nada que ler. Instalacións municipais reducidas a espazos inertes como sucede en moitos dos actuais centros cívicos, rebautizados como oficinas de distrito, e barrios enteiros que continúan sen dispoñer de espazos axeitados para o desenvolvemento de actividades de carácter comunitario e sociocultural. E a carencia xeneralizada de servizos e dotacións destinados aos coidados.

A falla de diálogo e os graves tics autoritarios do actual Goberno municipal están a fanar o dereito da cidadanía á participación, como pedra de toque dunha verdadeira e efectiva democracia. Mentres se suceden os anuncios de proxectos millonarios, con *renders* e infografías oportunamente filtradas e que en moitos casos nunca se tornan realidade, fundamentalmente concentrados nos ámbitos centrais da cidade, a resposta que reciben as demandas veciñais dos diferentes barrios e parroquias é, no mellor dos casos, a indiferenza en forma de silencio, e no peor, a explícita represión, exercendo toda caste de violencia administrativa e institucional contra aquelas asociacións que se atreven a denunciar as problemáticas dos seus barrios e a reivindicar as melloras que precisan e merecen.

Na mesma cidade na que un muro pode permanecer a medio caer impedindo o tránsito en vía pública durante máis de tres anos, como sucedeu no Freixeiro,

cada semana hai unha espectacular e mediática visita ao ascensor HALO. Cando os parques públicos sofren un clamoroso abandono (da Riouxa até Castrelos, pasando polo Castro ou polo Liste, até chegar ao García Picher ou aos parques forestais) procurase tapar esa realidade enmacetando unha árbore-banco na Porta do Sol. Mentres os museos da cidade esmorecen, coa metade das visitas arestora das que tiñan no ano 2011, preséntase con actos fastuosos a musealización do Castro. Mentres a piscina de Teis continúa inutilizada, un ano despois, prométense unha e outra vez os mesmos pavillóns que nunca se constrúen. Ao tempo que se bloquea a recuperación para a cidade da ETEA anúnciase a multiplicación das escaleiras mecánicas na Gran Vía. Cando hai avenidas céntricas que xa suman varias humanizacións e rehumanizacións nos últimos anos, son moitos os camiños e viais nos que o Concello non investiu un euro desde hai décadas.

Polo que, a través desta moción, o Bloque Nacionalista Galego propón ao Pleno a adopción dos seguintes

ACORDOS:

Instar ao Goberno municipal a:

Primeiro.- Despregar, coa participación directa do movemento veciñal na súa definición, un Programa Plurianual e Extraordinario de Investimentos para a Atención de todos os Barrios e Parroquias (PLAN CIDADE), para os vindeiros tres exercicios, financiado con como mínimo 50 millóns de euros dos remanentes municipais.

Segundo.- Impulsar a descentralización administrativa do Concello e o alargamento da participación cidadá coa creación dos Consellos Veciñais de Barrio e de Parroquia, como espazos de co-decisión que participen directamente na definición das políticas municipais e, nomeadamente, os investimentos do Concello no seu ámbito.

Terceiro.- Poñer en marcha dun sistema de orzamentos participativos que garanta a atención das necesidades do conxunto da cidade e poña fin ao déficit dotacional e de servizos que padecen os barrios e parroquias.

Cuarto.- Crear equipas e brigadas municipais para a atención áxil das necesidades de mantemento dos espazos públicos e mellorar o control das empresas concesionarias e contratas municipais.

Quinto.- Activar a Comisión Especial de Queixas e Suxestións, permitindo a participación como convidadas permanentes de todas as entidades que fan parte do Consello Social da Cidade, para facer un seguimento mensual da resolución das mesmas por parte dos diferentes servizos municipais.

Sexto.- Implementar un visor económico municipal, con información en tempo real e series históricas, accesíbel polo conxunto da cidadanía desde o portal web do Concello, no que se recolla o grao de execución orzamentaria, desagregada por capítulo, servizo, programa e aplicación e desglosando territorialmente os investimentos por barrios e parroquias.

Sétimo.- Normalizar a relación institucional do Goberno municipal con todas as entidades do movemento veciñal da cidade, garantindo canles fluídas de colaboración para a adecuada atención das súas demandas e reivindicacións e poñendo fin a calquera tipo de represalias en contra daqueles colectivos que discrepan ou manteñen posicións diferentes ás do Goberno municipal.

Vigo, Galiza, 20 de setembro de 2023.

Asdo.



SR. ALCALDE-PRESIDENTE

CONCELLO DE VIGO